

04. oktober

UKA 2017/108

Uunga siunnersuut: Immakkut angallatit angallatikullu umiarsualivinniittut peerneqararnerat pillugu Inatsisartut inatsisaat nr. xx, xx.xxx 2017-imeersoq.
(Aningaasaqarnermut akileraartarnermullu Naalakkersuisoq)

Naalakkersuisut inatsisissatut siunnersuutaannut Siumumiit imaattumik oqaaseqaateqassaagut:

Siumumiit, Nunatsinni angallatit atorunnaartut aammalu angallatit qimaannakkat mingutsitseratarsinnaasullu pillugit inatsisitigut illersugaasumik peersinnaalernissaq pillugu Naalakkersuisut Inatsisartut inatsisissaattut siunnersuutaannut isumaqataanerput ersersikkumavarput.

Pinngortitap innarlitsaaliorneqarnissaa Siumumiit pingaartittuagaraarput taamaattumillu aamma qujarunnartutut isigaarput angallatit umiarsualinni qimaannakka immaqaluunniit sivitsortumi uninngatiinnarneqartut taamalillutillu innarlerlutik mingutitsinissaminnut navianartorsiulersitsisut piaartumik peerneqartarnissaat, taamaalilluni pinngortitap uuliaarluarfigineqarsinnaanera imalt. allatigut angallatip imaanik pinngortitamut ulorianartorsiortitsisinnaasunik kivisoqaqqunagu.

Taamatuttaaq umiarsualivinni tattorliuuffioqisuni ilaatigut takussaapput umiarsuaaqqat angallatillu allat ukiorpassuarni uninngaannarlutik tassaniittut aserfallassimaqisut. Taamatuttaaq inissamik tigusingaatsiarsimasut aammalu uninngaqaataasunut innarleeratarsinnaasut.

Taamaattumik Siumumiit isumaqarpugut Inatsisartut inatsisissaattut Naalakkersuisut siunnersuutaat iluaqutissartaqartoq pinngortitamik illersuinerup tungaatigut aammalu inuussutissarsiornerup iluani akimmisaarutaasunik paaasinnaasoq.

Taamatut oqaaseqarluta Naalakkersuisut Inatsisartut inatsisissaattut siunnersuut aappasaaneerneqartinnani Inatsisartut ataatsimiitsitaliaannut susassaqaartumut sukumiisumik suliarineqarnissaa Siumumiit inassutigaaarput.

Ineqi Kielsen
Siumut